

南無本師釋迦牟尼佛（三稱）

無上甚深微妙法 百千萬劫難遭遇  
我今見聞得受持 願解如來真實義

悲華經卷第九

檀波羅蜜品第五之二

善男子！云何菩薩摩訶薩助菩提法清淨之門？善男子！布施即是助菩提法，化眾生故。持戒即是助菩提法，具足善願故。忍辱即是助菩提法，具足三十二相、八十隨形好故。精進即是助菩提法，於諸眾生勤教化故。禪定即是助菩提法，令心具足得調伏故。智慧即是助菩提法，具足能知諸煩惱故。多聞即是助菩提法，於諸法中具無礙故。一切功德即是助菩提法，一切眾生得具足故。智業即是助菩提法，得具足無礙智故。修定即是助菩提法，悉得成就柔軟心故。慧業即是助菩提法，遠離一切諸疑惑故。慈心即是助菩提法，於諸眾生，心無礙故。悲心即是助菩提法，拔出眾生諸苦故。喜心即是助菩提法，受樂法故。捨心即是助菩提法，斷憎愛故。聽法即是助菩提法，斷五蓋故。出世即是助菩提法，捨諸所有故。阿蘭若即是助菩提法，離諸匆務故。專念即是助菩提法，得陀羅尼故。正憶即是助菩提法，分別意識故。思惟即是助菩提法，於諸法中得成就義故。念處即是助菩提法，身受心法覺分別故。正勤即是助菩提法，斷不善法修善法故。如意足即是助菩提法，身心輕利故。諸根即是助菩提法，得一

切眾生根具足故。諸力即是助菩提法，具足能壞諸煩惱故。諸覺即是助菩提法，於諸法中具足覺知實法相故。正道即是助菩提法，遠離一切諸邪道故。聖諦即是助菩提法，斷滅一切諸煩惱故。四辯即是助菩提法，得斷眾生諸疑惑故。緣念即是助菩提法，不從他聞得智慧故。善友即是助菩提法，一切功德持成就故。發心即是助菩提法，成就不誑諸眾生故。用意即是助菩提法，出一切法故。專心即是助菩提法，增益善法故。思惟善法即是助菩提法，隨所聞法得成就故。攝取即是助菩提法，成就教化諸眾生故。護持正法即是助菩提法，令三寶種不斷絕故。善願即是助菩提法，成就嚴淨佛世界故。方便即是助菩提法，速得成就一切智故。善男子！是名菩薩摩訶薩助菩提法清淨門經。』

善男子！爾時，寶藏如來四顧遍觀菩薩大眾，告大悲言：『大悲！云何菩薩以無所畏莊嚴瓔珞，具足於忍？善男子！若菩薩見第一義，得無癡精進不著三界，若不著三界，是謂三昧無畏沙門之法，如空中動手悉無所著，又觀諸法不見相貌。大悲！是名菩薩摩訶薩以無所畏莊嚴瓔珞。善男子！云何菩薩具足於忍？如是菩薩住於法時，不見諸法如微塵相貌，逆順觀行於諸法中解無果報，於所習慈了無有我，於所習悲了無眾生，於所習喜了無有命，於所習捨了無有人。雖行布施不見施物，雖行持戒不見淨心，雖行忍辱不見眾生，雖行精進無離欲心，雖行禪定無除惡心，雖行智慧心無所行，雖

行念處不見思惟，雖行正勤不見心之生滅，雖行如意足不見無量心，雖行於信不見無障礙心，雖行於念不見心得自在，雖行於定不見入定心，雖行於慧不見慧根，雖行諸力無所破壞，雖行諸覺心無分別，雖行正道不見諸法，雖行定業不見心之寂靜，雖行慧業不見心之所行，雖行聖諦不見通達法相，雖修念佛不見無量行心，雖修念法心等法界，雖修念僧心無所住，教化眾生心得清淨。雖持正法於諸法界心不分別，雖修淨土其心平等猶如虛空，雖修相好心無諸相，雖行忍辱心無所有，雖住不退常自不見退與不退。雖行道場，解了三界無有異相，雖壞諸魔乃是利益無量眾生，雖行菩提觀諸法空無菩提心，雖轉法輪於一切法無轉無還，雖復示現大般涅槃，於生死中心等無異。是名菩薩具足於忍。』」

說是法時，有六十四億菩薩摩訶薩從十方來，至耆闍崛山釋迦牟尼佛所，聽此本緣三昧助菩提法清淨門經，聞是法已得無生忍。

爾時，釋迦牟尼佛告諸大眾：「汝今當知！寶藏如來於往古世說是法時，有四十八恆河沙等菩薩摩訶薩得無生忍，四天下微塵數等菩薩摩訶薩住不退轉地，一恆河沙等菩薩摩訶薩得此本緣三昧助菩提法清淨門經。善男子！爾時大悲菩薩聞是法已，心生歡喜即得變身，其狀猶如年二十人，追隨如來猶影隨形。善男子！爾時轉輪聖王及其千子，八萬四千小王

，九十二億人悉共出家，奉持禁戒修學多聞，忍辱三昧勤行精進。

善男子！爾時，大悲菩薩摩訶薩漸漸從佛諮受聲聞所有八萬四千法聚，緣覺所有九萬法聚，受持諷誦悉令通利；大乘法藏身念處中十萬法聚、受念處中十萬法聚、心念處中十萬法聚、法念處中十萬法聚，悉皆受持讀誦通利；十八界中十萬法聚、十二入中十萬法聚、斷除貪欲十萬法聚、斷除瞋恚十萬法聚、斷除愚癡十萬法聚、三昧解脫十萬法聚、諸力無畏不共之法十萬法聚，如是等十億法聚皆悉受持讀誦通利。

善男子！其後彼佛入般涅槃。爾時，大悲菩薩摩訶薩以無量無邊種種諸華末香塗香、寶幢幡蓋珍寶伎樂而以供養，以種種香積以為積，闍維其身收取舍利，起七寶塔高五由旬，縱廣正等滿一由旬。於七日中復以種種無量無邊華香伎樂、寶幢幡蓋而供養之。爾時，復令無量無邊眾生安止住於三乘法中。

善男子！大悲菩薩過七日已，與八萬四千人俱共出家，剃除鬚髮著染袈裟，於寶藏佛般涅槃後，隨順等心熾然正法滿十千歲。復令無量無邊阿僧祇眾生，安止住於三乘法中，及三歸依，五戒八齋，沙彌十戒，次第具足大僧淨行。復更勸化無量百千萬億眾生，安止住於神通方便四無量行。令觀五陰

猶如怨賊，觀於諸入如空聚落，觀有為法從因緣生，勸化眾生令得知見，觀一切法如鏡中像，如熱時炎如水中月，於諸法中皆知無我無生無滅，第一寂靜微妙涅槃。復令無量無邊眾生安止住於八聖道中，作如是等大利益已即便命終。尋時復有無量無邊百千諸人，以種種供養，供養大悲比丘舍利，其所供養悉如轉輪聖王之法，如是大眾種種供養大悲舍利亦復如是。大悲比丘命終之日，寶藏如來所有正法即於其日滅盡無餘。彼時菩薩以本願故生於佛土，或生兜術人中龍中，或夜叉中或阿修羅，生於種種畜生之中。

善男子！大悲比丘命終之後以本願故，南方去此十千佛土，有佛世界名曰歡樂，彼中人民壽八十歲，集聚一切諸不善根，喜為殺害安住諸惡，於諸眾生無慈悲心，不孝父母乃至不畏未來之世。大悲比丘以本願故，生彼世界旃陀羅家，所受身體長大端正，力勢剛強威猛勇健，專念問答辯才捷疾，如是諸事悉勝於人，以強力勢逼捉諸人，作如是言：『汝今若能受不盜戒，乃至遠離種種邪見行正見者，當施汝命，給汝所須資產之物令無所乏。若不受者，我今要當斷汝命根然後乃去。』爾時諸人長跪叉手作如是言：『仁者今已為我調御，如仁所勅我今授持，盡其壽命不復偷盜，乃至正見亦復如是。』

爾時強力旃陀羅往至王所或大臣所，作如是言：『我今困乏

資產之具，所謂飲食醫藥衣服、臥具香華金銀錢貨、真珠琉璃珂貝璧玉、珊瑚琥珀真寶偽寶，若我得此種種物已，持施眾生。』爾時國王大臣即與種種所須之物，令其充足。時旃陀羅因其施故，安止此王及其大臣住十善中。爾時人民增益壽命滿五百歲，其王命終，諸大臣等以旃陀羅紹繼王位，因為作字號功德力。

善男子！爾時功德力王不久王一國土，復以力故王二國土，如是不久乃至得作轉輪聖王王閻浮提，然後教化一切眾生，安止令住不殺生戒，乃至正見亦復如是，隨諸眾生心所志樂，勸化令住於三乘中。爾時功德力王教化閻浮提內無量眾生，於十善道及三乘中已，於閻浮提內大聲唱言：『若有乞求欲須食飲，乃至欲得種種珍寶，悉來至此我當給施。』是時閻浮提內一切乞士，聞是唱已悉來集會，時功德力王種種隨意給施所須，皆令滿足。爾時有一尼乾子名曰灰音，往至王所而作是言：『王今所作種種大施，以求無上正真之道，我今所須王當與我令得滿足，王於來世當熾然法燈。』時王問言：『卿何所須？』彼人答言：『我誦持咒術，欲得與彼阿修羅鬥，怖其破壞自得勝利，是故白王如是事耳。所可須者，未死之人之皮與眼。』

爾時大王聞是語已，如是思惟：『我今得是無量力勢轉輪聖王，已得安止無量眾生，住於十善及三乘中，復作無量無邊

大施。此善知識欲令我以不堅牢身質堅牢身。』爾時大王便作是言：『汝今可生歡喜之心，我今以此凡夫肉眼布施於汝，以是緣故，令我來世得清淨慧眼。以歡喜心剝皮施汝，復以是緣，令我成阿耨多羅三藐三菩提已，得金色身。』善男子！爾時，功德力王以其右手挑取二目施尼乾子，血流污面而作是言：『諸天龍神、乾闥婆、阿修羅、迦樓羅、緊那羅、摩睺羅伽、人非人等若在虛空若因地者，悉聽我言。我今所施皆為無上菩提之道白淨涅槃，度諸眾生於四流水，令得安止住於涅槃。』復作是言：『若我必定成阿耨多羅三藐三菩提者，雖作是事所有命根不應斷壞，不失正念不應生悔，令尼乾子所作咒術便得成就。』復作是言：『汝今可來剝取我皮。』善男子！時尼乾子即持利刀剝取王皮，卻後七日所作咒術悉得成就。爾時大王於七日中，其命未終不失正念，雖受是苦乃至一念不生悔心。

善男子！汝今當知，爾時大悲菩薩者豈異人乎？莫作是觀則我身是。於過去世寶藏佛所，初發阿耨多羅三藐三菩提心，初發心已，勸化無量無邊眾生於阿耨多羅三藐三菩提。

善男子！是我最初勇健精進，爾時我以本願力故，命終生於歡樂世界旃陀羅家，是我第二勇健精進。我生旃陀羅家，教化眾生於善法中，以自力勢乃至得作轉輪聖王，滅閻浮提鬥諍穢濁，令得寂靜增長壽命，是我初始捨於身皮及以眼目。

善男子！我以願故於彼命終，復還來生歡樂世界旃陀羅家，乃至得作轉輪聖王，以大勢力安止眾生於善法中，於彼世界復得除滅怨賊鬥諍穢濁之事，令諸眾生增益壽命，我於爾時始捨舌耳。於彼三千大千世界一一天下，作如是等大利益已，以願力故精進堅牢。如是次第復於如是一恆河沙等五濁惡世作大利益，安止眾生住於善法及三乘中，滅除怨賊鬥諍穢濁。

善男子！其餘他方清淨世界所有諸佛，本行阿耨多羅三藐三菩提時，不說他過，不為他人說麤惡言，不以力勢示現恐怖，不勸眾生於聲聞乘辟支佛乘，是故諸佛具滿成就阿耨多羅三藐三菩提已，得此清淨妙好世界，無諸罪名無有受戒，耳終不聞麤惡之言，無不善聲常聞法聲，離於一切不適意聲，於諸眾生而得自在，無有聲聞辟支佛名。

善男子！我於恆河沙等大劫，如恆河沙等無佛國土五濁之世，以麤惡言斷命因緣恐怖眾生，然後勸令安住善法及三乘中，是餘業故，今得如是弊惡世界。以不善音唱滿世界，是故今得不善眾生充滿世界。說三乘法如我本願取佛世界，調伏眾生其事如是，我已如說精勤修習行菩提道，是故今得種子相似佛之世界，如我本願今得如是。

善男子！今我略說往昔所行檀波羅蜜。我行檀波羅蜜時，過



去諸菩薩行菩薩道時，亦無有能作如是行，未來之世行菩薩道者，亦無有能作如是行。我為菩薩行檀波羅蜜時，離除過去八善丈夫：第一菩薩名曰一地得，在此南方一切過患國成阿耨多羅三藐三菩提，號破煩惱光明如來、應供、正遍知、明行足、善逝、世間解、無上士、調御丈夫、天人師、佛、世尊，人壽百歲於中說法，七日之後入般涅槃。第二菩薩名精進淨，在此東方炎熾國土成阿耨多羅三藐三菩提，號百功德如來、應供、正遍知、明行足、善逝、世間解、無上士、調御丈夫、天人師、佛、世尊，人壽百歲於中說法作佛事已，彼佛過一恆河沙等大劫已入無上涅槃，其佛舍利，乃至今日在無佛國作於佛事，如我無異。第三菩薩名堅固華，於諸三昧勤行精進，以大力勢行於布施，於當來世過十恆河沙等大劫，在此北方歡樂世界成阿耨多羅三藐三菩提，號斷愛王如來、應供、正遍知、明行足、善逝、世間解、無上士、調御丈夫、天人師、佛、世尊。第四菩薩名曰慧熾攝取歡喜，過一大劫在此西方可畏世界，人壽百歲於中成阿耨多羅三藐三菩提，號日藏光明無垢尊王如來、應供、正遍知、明行足、善逝、世間解、無上士、調御丈夫、天人師、佛、世尊。於今我前有二菩薩，一名日光，二名喜臂，未來之世過於無量無邊大劫，在此上方灰霧國土，劫名大亂，五濁惡世多諸煩惱人壽五十歲，日光菩薩以本願故於中成阿耨多羅三藐三菩提，號不思議日光明如來、應供、正遍知、明行足、善逝、世間解、無上士、調御丈夫、天人師、佛、世尊，滿十歲

中具足佛事而般涅槃，即涅槃日正法亦滅。其後十歲空過無佛，人壽轉減至三十歲，喜臂菩薩以本願故於中得成阿耨多羅三藐三菩提，號勝日光明如來、應供、正遍知、明行足、善逝、世間解、無上士、調御丈夫、天人師、佛、世尊。彼佛世尊亦十歲中具足佛事而般涅槃，般涅槃已以本願故，正法住世滿七十歲。時二菩薩在於我前始得授阿耨多羅三藐三菩提記，以聞記故心生歡喜頭面敬禮。以歡喜故上昇虛空高七多羅樹，叉手向佛異口同音而說偈言：

如來光炎	殊於日月	能於惡世	演大智慧
調御目淨	無有垢穢	以妙論議	摧伏外道
我無量劫	修無相定	以求無上	勝妙菩提
供養諸佛	數如恆沙	而過去佛	不授我記
世尊離欲	心得解脫	於黑闇世	善為佛事
為諸失道	眾生說法	悉令得出	生死漂流
我今所願	於此自在	清淨佛法	出家修道
解脫淨戒	如說而行	定心隨佛	如影隨形
不為利養	但求正法	得聞法已	服甘露味
是故世尊	與我授記	於未來世	得無上道

善男子！其餘二人故未發心。已發心者，一名日光，二名喜臂。先有四人，一名地得，二名精進淨，三名堅固華，四名慧熾攝取歡喜，合有八人，是六菩薩，我初勸其令發阿耨多羅三藐三菩提心。

善男子！汝今諦聽往昔因緣。過去無量阿僧祇劫，爾時此界名無垢須彌，人壽百歲，有佛出世號香蓮華，般涅槃後像法之中，我於爾時作大強力轉輪聖王號難沮壞，王閻浮提千子具足，我悉勸化令發阿耨多羅三藐三菩提心，其後尋於香蓮華佛像法之中出家修道，熾然增益佛之道法，唯除六子不肯出家發菩提心。我於爾時數數告言：『卿等今者欲何所求？何以不發無上道心出家修道？』是時六子作如是言：『不應出家。所以者何？若於末世像法出家，不能成就護持戒聚，離聖七財。以不護戒，沒於生死污泥之中，墮三惡道不能得生天上人中。以是因緣，我等不能出家修道。』

善男子！我復重問：『卿等何以不發無上道心？』六子答言：『若能與我閻浮提者，然後我當發阿耨多羅三藐三菩提心。』

善男子！我聞是已心生歡喜作是思惟：『我今已化閻浮提人，安置三歸受八戒齋住於三乘，我今當分此閻浮提以為六分與此六子，令其得發無上道心，然後我當出家修道。』思惟是已如其所念，分閻浮提即為六分，賜與諸子尋便出家。爾時六王各相違戾，不相承順互相抄掠，攻伐鬥諍縛束枷鎖。爾時一切閻浮提內，苗稼不登人民飢餓，水雨不時諸樹枯悴，不生華實藥草不生，人民禽獸及諸飛鳥悉皆飢餓，其身熾

然猶如火聚。我於爾時復自思惟：『我今應當自捨己身肌體血肉，以施眾生令其飽滿。』作是念已，從其所住阿蘭若處至於人間，中路有山名水愛護，住是山上復作是願而說偈言：

如我自捨	所有身命	為大悲心	不求果報
但為利益	諸天及人	願作肉山	給施眾生
我今所捨	妙色端嚴	不求帝釋	天魔梵王
但為利益	未來人天	以此血肉	施諸眾生
諸天龍神	人及非人	住山林者	今聽我言
為諸眾生	我起大悲	自以血肉	而給施之

善男子！我於爾時作是願已，諸天搔擾，大地諸山須彌大海皆六種動，人天大眾發聲悲號。爾時，我於水愛護山自投其身，以願力故即成肉山高一由旬，縱廣正等亦一由旬，是時人民飛鳥禽獸，始於是時噉肉飲血。以本願故，於中夜分增益廣大其身，乃至高千由旬，縱廣正等亦千由旬，其邊自然而生人頭，髮毛眼耳、鼻口脣舌具足而有。彼諸頭中各各有聲而唱是言：『諸眾生等，各各自恣隨意取用飲血噉肉，取頭目耳鼻脣舌齒等，皆令滿足，然後悉發阿耨多羅三藐三菩提心，或發聲聞辟支佛心。卿等當知如是之物悉不可盡，食之易消不夭壽命。』

有明智者食肉飲血，取其頭目耳鼻舌者，或發聲聞辟支佛乘

，或發阿耨多羅三藐三菩提心，或求天上人中富樂。以本願故身無損減乃至萬歲，閻浮提內人及鬼神、飛鳥禽獸皆悉充足。於萬歲中所施目如一恆河沙，所施血如四大海水，所捨肉如千須彌山，所捨舌如大鐵圍山，所捨耳如純陀羅山，所捨鼻如毘富羅山，所捨齒如耆闍崛山，所捨身皮猶如三千大千世界所有地等。

善男子！汝今當知！我於往昔萬歲之中所捨無量無邊阿僧祇身，一壽命中，自以血肉給施如是無量無邊阿僧祇眾生，悉令飽足，乃至一念不生悔心。我於爾時復作是言：『若我必定成阿耨多羅三藐三菩提，所願成就得己利者，我今於此一閻浮提萬歲之中，自以血肉給施一切無量眾生。如是一恆河沙等萬歲，遍滿於此無垢須彌三千大千世界，作血肉山。一一天下於萬歲中，自以血肉頭目耳等給施眾生，所謂天龍鬼神、人及非人、一切畜生，若在虛空及因地者，乃至餓鬼悉令滿足，然後勸化安置住於三乘法中。若遍於此一佛世界滿足眾生已，復至十方如一恆河沙等五濁惡世，復捨血肉頭目耳等，給施眾生悉令充足。如是如一恆河沙等大劫之中為眾生故，自捨身命以施眾生。若我所願不成不得已利者，即便欺誑十方世界無量無邊諸佛世尊，為諸眾生轉法輪者，必定不成阿耨多羅三藐三菩提，住於生死，畢竟不聞佛聲、法聲、比丘僧聲、波羅蜜聲、力無畏聲、乃至一切諸善根聲。若我不能成就捨身布施充足諸眾生者，常墮阿鼻地獄。』

善男子！我於往昔如是所願皆悉成就，於一一天下，捨身血肉給施眾生悉令飽滿。如是次第遍滿十方如恆河沙等諸佛世界，捨身血肉給施眾生悉令滿足。

善男子！汝今當知！我於爾時為檀波羅蜜捨身布施，如是次第施於眼目，其聚滿此閻浮提內高至忉利天。善男子！是名如來略說捨身檀波羅蜜。

復次善男子！如是復過無量無邊阿僧祇劫，爾時此界轉名月雷，亦五濁世。我於是時作轉輪聖王，王閻浮提號燈光明，亦教無量無邊阿僧祇人安止住於諸善法中，亦如上說。作是事已，遊在園林觀看土地，見有一人身被縛束，我即問言：『此何所犯？』大臣白言：『諸有田作所得穀麥應為六分，一分入官。是人不順王法不肯輸送，是故被縛。』我於爾時即敕令放，從今已後不須強取。大臣答言：『是人民中，乃至無有一人生歡喜心，以義送之。今諸王子、後宮眷屬、貴人嫖女，諸所資用飲食之具，一切皆從他邊強取，無有一人清淨心與。』

我聞是已心大憂愁，即自思惟：『此閻浮提當持與誰？』爾時我有五百諸子，先已令發無上道心，當分此地為五百分等與諸子。我當出家至阿蘭若處，修諸仙法學淨梵行。思惟是

已，尋分此地為五百分，等與諸子即便出家，至南海邊鬱頭摩樹大林之中食諸果子，漸漸修學得五神通。

善男子！時閻浮提有五百商人入於大海欲採珍寶，有一商主名曰滿月，此人先世福德緣故，得如所願，至於寶渚多取種種諸珍寶已，即欲發引還閻浮提。爾時海神高聲啼哭，多有諸龍心懷瞋恚欲害商人。有一龍王名曰馬堅，是大菩薩，以本願故生於龍中，起慈悲心救護諸商，令得安隱過於大海至彼岸邊，龍王然後還本住處。爾時復有大惡羅刹隨逐商人，如影隨形欲為虐害，是惡羅刹即於其日放大惡風，時諸商人迷悶失道，生大怖畏失聲號哭，稱喚諸天摩醯首羅、水神地神、火神風神，復稱父母妻子眷屬，願救濟我。善男子！我於爾時以淨天耳聞其音聲，尋往其所，以柔軟音而慰撫之：

『莫生怖畏當示汝道，令汝安隱還閻浮提。』善男子！我於爾時白氎纏臂，以油灌之然以為炬，發真實言：『我先以於鬱頭摩林，三十年中專精修行四無量心，為諸眾生食噉果子，勸化八萬四千諸龍夜叉神等，不退轉於阿耨多羅三藐三菩提。以是善根因緣，今然此臂為示道故，令是諸商安隱得還閻浮提中。』然臂乃至七日七夜，此諸商人尋便安隱還閻浮提。

善男子！我於爾時復作善願：『若閻浮提無諸珍寶，若我必成阿耨多羅三藐三菩提，得已利者當作商主，於一一天下七

返雨寶。復入大海取如意珠，於一一天下復雨種種雜廁寶物。如是次第遍此世界，乃至十方無量無邊阿僧祇諸世界中亦復如是。』

善男子！我於往昔諸所發願皆悉成就，如恆河沙等大劫中常作無上薩薄之主，於恆河沙等五濁惡世雨種種珍寶，一日之中七返雨之，如是利益無量眾生，悉令珍寶得滿足已，然後勸化安止令住於三乘中。善男子！汝今當知！即是如來捨諸珍寶，為得諸相善根因緣。

復次善男子！如是復過無量無邊阿僧祇劫，此佛世界轉名為網，劫名知具足，其世五濁，人民壽命滿五萬歲。以本願故生閻浮提婆羅門家，字曰須香，讀誦外典闡陀章句。爾時眾生多著常見，互共鬥諍起怨賊想。我於爾時以強力勢，為諸眾生說五受陰猶如怨家，說十二入如空聚落，說十二緣其性生滅，開示分別阿那波那，令其修學，復作是言：『仁等今者可發無上菩提之心，所作善根應生迴向。』我於是時自然而得五通神仙，爾時復有無量無邊阿僧祇人受我教故，悉得五通。復有無量無邊眾生遠離鬥諍滅除怨憎，出家入山食果蓏子，晝夜修習四無量心。是劫欲盡是諸人等，各各分散遊閻浮提教化眾生，令離鬥諍除滅怨憎悉使寂靜，或有水旱暴風惡雨皆令除滅，其地柔軟五穀成熟食飲滋味。以劫欲盡，眾生復為種種病苦之所纏惱。



善男子！我於爾時尋復思惟：『若我不能除眾生病，我則不成阿耨多羅三藐三菩提，為諸眾生斷除煩惱。我今當以何等方便除眾生病？唯有聚集一切大眾、釋天梵天、四天王等，及諸天龍仙人仙，問諸醫方合集諸草，種種咒術以療眾病。』思惟是已，即以神力至釋天梵天、四天王天，及諸神天龍人仙所，作如是言：『有毘陀山，願諸仁等皆共來集。』爾時，大眾聞是言已皆悉集聚。既集聚已，皆共誦持毘陀咒術，以是力故能卻一切諸惡鬼神，擁護眾生。復修醫方，能治痰癥風寒冷熱，以是因緣，令無量無邊阿僧祇人離諸苦惱。

善男子！我於爾時復更作願：『若我已為此一天下無量眾生，作智慧光，安止住於三乘法中，閉三惡門通天人路，除諸病苦令得歡樂；復當次第為無量無邊阿僧祇人，作智慧光乃至歡樂，以是善根因緣果報故，令我所願皆得成就逮得己利。如我已為此一天下無量無邊阿僧祇人，閉三惡道通天人路，為諸病者請諸天龍神仙之人，集毘陀山修毘陀咒，令無量無邊阿僧祇人悉得離病受於快樂，如是遍滿此網世界，利益一切在在處處無量眾生安住三乘，閉三惡道通天人路。復為如是世界病者，請諸天龍神仙之人，集毘陀山修毘陀咒，令此世界無量無邊阿僧祇人，悉得離病受於快樂。如此世界，乃至十方如恆河沙等五濁惡世，亦復如是。』

善男子！我於爾時在網世界，乃至十方恆河沙五濁惡世，諸所作願皆得成就。善男子！汝今當知！即是如來為菩薩時，增益智慧修菩薩道，是名如來愛護三業善根種子。」

### 悲華經卷第九

離婆離婆帝 求訶求訶帝 陀羅尼帝 尼訶囉帝  
毗黎你帝 摩訶伽帝 真陵乾帝 娑婆訶（七遍）

南無喝囉怛那 哆囉夜耶 佉囉佉囉  
俱住俱住 摩囉摩囉 虎囉 吽 賀賀  
蘇怛拏 吽 潑抹拏 娑婆訶（三遍）

願以此功德 莊嚴佛淨土 上報四聖恩 下濟六凡苦  
所有法界眾 悉修菩提行 盡此一報身 同生極樂國